

元史卷一百四十一

明翰林學士亞中大夫知制誥兼修國史宋濂等修
列傳第二十八

台哈布哈

台哈布哈

原作太不花

鴻吉哩氏世爲外戚官最貴顯台哈布哈沉厚

有大度以世胄入官累遷雲南行省右丞歷通政使上都留守遼
陽行省平章政事至正八年太平爲丞相力薦台哈布哈可大用
召爲中書平章政事明年太平旣罷托克托復相台哈布哈因黨
于托克托謀害太平衆由是不平之十二年盜起河南知樞密院
事婁章出師久無功詔拜台哈布哈河南行省平章政事加太尉
將兵往代之未期月平南陽汝寧唐隨又下安陸德安等路招降
服叛動合事宜軍聲大振十四年托克托以太師右丞相總大兵

征高郵尋詔奪其兵柄而升台哈布哈本省左丞相與太尉伊徹
察喇樞密知院舒蘇代總其兵山東河北諸軍悉令台哈布哈節
制台哈布哈乃以軍士乏糧之故頗驕傲不遵朝廷命令軍士往
往剽掠爲民患十五年監察御史伊埒呼圖克等劾其慢功虐民
之罪於是天子下詔盡奪其職俾率領和寶袞從平章政事達實
巴圖爾征進項之復拜湖廣行省左丞相節制湖廣荆襄諸軍招
捕沔陽湖廣等處水陸賊徒會朝廷復拜太平爲中書左丞相台
哈布哈聞之意不能平歎曰我不負朝廷朝廷負我矣太平漢人
今乃復居中用事安受逸樂我反在外勤苦邪及擊賊賊且退諸
將皆欲乘勝渡江而台哈布哈反勒兵而退以養銳爲名其後賊
犯汴梁守臣請援兵至十往反台哈布哈始率兵援汴梁而猶按
甲不進時睢毫太康俱已陷邊警曰急或諫之曰賊旦夕且至丞

相兵不進何也台哈布哈顧左右大言曰我在何物小寇敢犯境邪若等毋多言我自有神算也旣而縱軍出掠百里之內蕩然無遺繼又渡師河北聲取曹濮遂駐於彰德衛輝俄而曹濮之賊奔竄晉冀大同亦相繼不守遂蔓延不可制朝廷以爲憂兩遣重臣諭以密旨授之成算台哈布哈恬不爲意是時其子壽通以同知樞密院事將兵分討山東久無功嘗以事入奏語言有驕慢意帝由是惡之十八年山東賊愈充斥且逼近京畿於是詔拜台哈布哈中書右丞相總其兵討山東旣渡河卽上疏以爲賊勢張甚軍行宜以糧餉爲先昔漢韓信行軍蕭何餽糧方今措畫無如丞相太平者如令太平至軍中供給事乃可濟不然兵不能進矣其意實銜太平欲其至軍中卽害之也時參知政事巴延特穆爾張晉等分省山東二人者嘗劾壽通不進兵台哈布哈至則以其餽運

不前斷遣之又以知樞密院事諤勒哲特穆爾爲右丞日嘗劾其
非亦加以失誤專制之罪擅改其官徵至軍欲害之事聞廷議喧
然而太平與台哈布哈久有隙會其疏來上以其欲害已也遂諷
監察御史茂濟嚕海等劾其緩師拒命之罪而於帝前力譖之於
是下詔削其官爵奪其兵柄安置于蓋州以知樞密院事烏蘭哈
達總其兵台哈布哈聞有詔夜馳詣劉哈喇布哈求救解劉哈喇
布哈者台哈布哈故部將也以破賊累有功拜淮南行省平章政
事時駐兵保定見台哈布哈來因張樂大宴舉酒慷慨言曰丞相
國家柱石有大勲勞如此天子終不害丞相是必讒言間之耳我
當自往見上言之丞相無憂也哈喇布哈卽走至京首見太平太
平問其來何故哈喇布哈具以故告之太平曰台哈布哈大逆不
道今詔已下爾乃敢輒妄言邪不審處禍將及爾矣哈喇布哈聞

太平言畏懼噤不能發太平度台哈布哈必在哈喇布哈所卽語之曰爾能致台哈布哈來吾以爾見上爾功不細矣哈喇布哈許之太平乃引入見帝賜賚良渥初劉哈喇布哈之爲部將於台哈布哈也與倪晦者同在幕下台哈布哈每委任晦而哈喇布哈計多阻不行哈喇布哈心常以爲怨及是知事已不可解還縛台哈布哈父子送京師未至皆殺之於路

察罕特穆爾

察罕特穆爾

原作察罕帖木兒

字廷瑞系出北庭曾祖庫庫台元初隨大

軍收河南至祖奈曼岱父阿魯威皆家河南爲潁州沈邱人察罕特穆爾幼篤學嘗應進士舉有時名身長七尺修眉覆目左頰有三毫或怒則毫皆直指居常慨然有當世之志至正十一年盜發汝潁焚城邑殺長吏所過殘破不數月江淮諸郡皆陷朝廷徵兵

致討卒無成功十二年察罕特穆爾乃奮義起兵沈邱之子弟從者數百人與信陽之羅山人李思齊合兵同設奇計襲破羅山事聞朝廷授察罕特穆爾中順大夫汝寧府達嚕噶齊於是所在義士俱將兵來會得萬人自成一軍屯沈邱數與賊戰輒克捷十五年賊勢滋蔓由汴以南陷鄧許嵩洛察罕特穆爾兵日益盛轉戰而北遂戍虎牢以遏賊鋒賊乃北渡盟津焚掠至覃懷河北震動察罕特穆爾進戰大敗之餘黨柵河洲殲之無遺類河北遂定朝廷奇其功除中書刑部侍郎階中議大夫苗軍以滎陽叛察罕特穆爾夜襲之虜其衆幾盡乃結營屯中牟已而淮右賊衆三十萬掠汴以西來擣中牟營察罕特穆爾結陳待之以死生利害諭士卒士卒賈勇決死戰無不一當百會大風揚沙自率猛士鼓譟從中起奮擊賊中堅賊勢遂披靡不能支棄旗鼓遁走追殺十餘里

斬首無算軍聲益大振十六年升中書兵部尚書階嘉議大夫繼而賊西陷陝州斷穀函勢欲趨秦晉知樞密院事達實巴圖爾方節制河南軍調察罕特穆爾與李思齊往攻之察罕特穆爾卽鼓行而西夜拔殺陵立柵交口陝爲城阻山帶河險且固而賊轉南山粟給食以堅守攻之猝不可拔察罕特穆爾乃焚馬矢營中如炊烟狀以疑賊而夜提兵拔靈寶城守旣備賊始覺不敢動卽渡河陷平陸掠安邑蹂晉南鄙察罕特穆爾追襲之賊之以鐵騎賊回扼下陽津赴水死者甚衆相持數月賊勢窮皆遁潰以功加中奉大夫僉河北行樞密院事十七年賊尋出襄樊陷商州攻武關官軍敗走遂直趨長安至灞上分道掠同華諸州三輔震恐陝西省臺來告急察罕特穆爾卽令大衆入潼關長驅而前與賊遇戰輒勝殺獲以億萬計賊餘黨皆散潰走南山入興元朝廷嘉其復

關陝有大功授資善大夫陝西行省左丞未幾賊出自巴蜀陷秦隴據鞏昌遂窺鳳翔察罕特穆爾卽先分兵入守鳳翔城而遣謀者誘賊圍鳳翔賊果來圍之厚凡數十重察罕特穆爾自將鐵騎晝夜馳二百里往赴比去城里所分軍張左右翼掩擊之城中軍亦開門鼓噪而出內外合擊呼聲動天地賊大潰自相踐蹂斬首數萬級伏屍百餘里餘黨皆遁還關中悉定十八年山東賊分道犯京畿朝廷徵四方兵入衛詔察罕特穆爾以兵屯涿州察罕特穆爾卽留兵戍清湫義谷屯潼關塞南山口以備他盜而自將銳卒往赴召而曹濮賊方分道踰太行焚上黨掠晉冀陷雲中鴈門代郡烽火數千里復大掠南且還察罕特穆爾先遣兵伏南山阻隘而自勒重兵屯聞喜絳陽賊果走南山縱伏兵橫擊之賊皆棄輜重走山谷其得南還者無幾乃分兵屯澤州塞碗子城屯上黨

塞吾兒谷屯并州塞井陘口以杜太行諸道賊屢至守將數血戰擊却之河東悉定進陝西行省右丞兼陝西行臺侍御史同知河南行樞密院事於是天子乃詔察罕特穆爾守禦關陝晉冀撫鎮漢沔荆襄便宜行間外事察罕特穆爾益務練兵訓農以平定四方爲己責是年安豐賊劉福通等陷汴梁造宮闕易正朔號召羣盜巴蜀荆楚江淮齊魯遼海西至甘肅所在兵起勢相聯結察罕特穆爾乃北塞太行南守鞏洛而自將中軍軍沔池會叛將周全棄鞏懷入汴城合兵攻洛陽察罕特穆爾下令嚴守備別以奇兵出宜陽而自將精騎發新安來援賊至城下見堅壁不可犯退引去因追至虎牢塞成臯諸險而還拜陝西行省平章政事仍兼同知行樞密院事便宜行事十九年察罕特穆爾圖復汴梁五月以大軍次虎牢先發遊騎南道出汴南畧歸亳陳蔡北道出汴東戰

船浮於河水陸並下畧曹南據黃陵渡乃大發秦兵出函關過虎牢晉兵出太行踰黃河俱會汴城下首奪其外城察罕特穆爾白將鐵騎屯杏花營諸將環城而壘賊屢出戰戰輒敗遂嬰城以守乃夜伏兵城南旦日遣苗軍跳梁者畧城而東賊傾城出追伏兵鼓噪起邀擊敗之又令弱卒立柵外城以餌賊賊出爭之弱卒佯走薄城西因突鐵騎縱擊悉擒其衆賊自是益不敢出八月諜知城中計窮食且盡與諸將閔思孝李克彛和爾齊賽音齊達呼托音布哈呂文諤勒哲賀宗哲安圖張守禮巴延孫蒯姚守德魏賽音布哈楊履信恭古等議各分門而攻至夜將士鼓勇登城斬關而入遂拔之劉福通奉其僞主從數百騎出東門遁走獲僞后及賊妻子數萬僞官五千符璽印章寶貨無算全居民二十萬軍不敢私市不易肆不旬日河南悉定獻捷京師歡聲動中外以功拜

河南行省平章政事兼知河南行樞密院事陝西行臺御史中丞
仍便宜行事詔告天下先是中原亂江南海漕不復通京師屢苦
饑至是河南既定檄書達江浙海漕乃復至察罕特穆爾既定河
南乃以兵分鎮關陝荆襄河洛江淮而重兵屯太行營壘旌旗相
望數千里乃日修車船繕兵甲務農積穀訓練士卒謀大舉以復
山東先是山西晉冀之地皆察罕特穆爾所平定而達實巴圖爾
之子曰博囉特穆爾以兵駐大同因欲并據晉冀遂至兵爭天子
屢下詔和解之終不聽事見本紀及達實巴圖爾傳中二十一年
謀知山東羣賊自相攻殺而濟寧田豐降於賊六月察罕特穆爾
乃輿疾自陝抵洛大會諸將與議師期發并州軍出井陘遼沁軍
出邯鄲澤潞軍出磁州懷衛軍出白馬及汴洛軍水陸俱下分道
並進而自率鐵騎建大將旗鼓渡孟津踰覃懷鼓行而東復冠州

東昌八月師至鹽河遣其子庫庫特穆爾及諸將等以精卒五萬
擣東平與東平賊兵遇兩戰皆敗之斬首萬餘級直抵其城下察
罕特穆爾以田豐據山東久軍民服之乃遣書諭以逆順之理豐
及王士誠皆降遂復東平濟寧時大軍猶未渡羣賊皆聚於濟南
而出兵齊河禹城以相抗察罕特穆爾分遣奇兵取間道出賊後
南畧泰安逼益都北徇濟陽章邱中循瀕海郡邑乃自將大軍渡
河與賊將戰於分齊大敗之進逼濟南城而齊河禹城俱來降南
道諸將亦報捷再敗益都兵於好石橋東至海濱郡邑聞風皆送
款攻圍濟南三月城乃下詔拜中書平章政事知河南山東行樞
密院事陝西行臺中丞如故察罕特穆爾遂移兵圍益都環城列
營凡數十大治攻具百道並進賊悉力拒守復掘重塹築長圍遏
南洋河以灌城中仍分守要害收輯流亡郡縣戶口再歸職方號

令煥然矣二十二年時山東俱平獨益都孤城猶未下六月田豐
王士誠陰結賊復圖叛田豐之降也察罕特穆爾推誠待之不疑
數獨入其帳中及豐既謀變乃請察罕特穆爾行觀營壘衆以爲
不可往察罕特穆爾曰吾推心待人安得人人而防之左右請以
力士從又不許乃從輕騎十有一人行至王信營又至豐營遂爲
王士誠所刺訃聞帝震悼朝廷公卿及京師四方之人不問男女
老幼無不慟哭者先是有白氣如索長五百餘丈起危宿掃太微
垣太史奏山東當大水帝曰不然山東必失一良將卽馳詔戒察
罕特穆爾勿輕舉未至而已及於難詔贈推誠定遠宣忠亮節功
臣開府儀同三司上柱國河南行省左丞相追封忠襄王諡獻武
及葬賜賻有加改贈宣忠興運宏仁效節功臣追封潁川王改諡
忠襄食邑沈邱縣所在立祠歲時致祭封其父阿魯威汝陽王後

又進封梁王於是復起庫庫特穆爾拜銀青榮祿大夫太尉中書平章政事知樞密院事皇太子詹事仍便宜行事襲總其父兵庫庫特穆爾旣領兵柄銜哀以討賊攻城益急而城守益固乃穴地通道以入十一月拔其城執其渠魁陳猺頭二百餘人獻闕下而取田豐王士誠之心以祭其父餘黨皆就誅卽遣關保以兵取莒州於是山東悉平庫庫特穆爾本察罕特穆爾之甥自幼養以爲子當是時東至淄沂西踰關陝皆晏然無事庫庫特穆爾乃駐兵於汴洛朝廷方倚之以爲安博囉特穆爾自察罕特穆爾旣沒復數以兵爭晉冀帝雖屢解諭之而讐隙日深二十三年御史大夫魯達實與知樞密院事圖沁特穆爾得罪於皇太子皇太子欲誅之皆奔於大同爲博囉特穆爾所匿魯達實者帝母舅以故帝數爲皇太子寢其事而皇太子不從帝無如之何則傳旨密令博囉

特穆爾隱其迹而丞相吹斯戡宦者保布哈皆附皇太子必窮竟其事皇太子又方倚重於庫庫特穆爾時庫庫特穆爾駐太原與博囉特穆爾構兵勢相持不可解二十四年吹斯戡保布哈因誣博囉特穆爾魯達實謀爲不軌而皇太子亦怒不已三月天子以故下詔數博囉特穆爾罪削其官職而奪其兵博囉特穆爾不受詔遂遣兵逼京師必欲得吹斯戡保布哈乃已天子不得已縛兩人與之語在吹斯戡博囉特穆爾傳七月博囉特穆爾又與魯達實合圖沁特穆爾兵同犯闕時庫庫特穆爾遣部將白索珠以萬騎衛京師駐於龍虎臺與戰不利遂奉皇太子奔於太原博囉特穆爾旣入朝據相位白索珠又將二萬騎屯漁陽爲朝廷聲援二十五年庫庫特穆爾以兵擣大同取之皇太子乃趣庫庫特穆爾大舉以討逆發丞相伊蘇兵屯東鄙魏遼齊吳豫幽諸王兵駐西

邊而自率庫庫特穆爾兵取中道抵京師亡何博囉特穆爾旣伏誅帝詔白索珠兵守京城遂詔皇太子還京而庫庫特穆爾亦扈從入朝九月詔拜巴咱爾右丞相庫庫特穆爾左丞相巴咱爾累朝舊臣而庫庫特穆爾以後生晚出乃與並相居兩月卽請南還視師是時中原雖無事而江淮川蜀皆非我所有皇太子累請出督師而帝難之乃詔封庫庫特穆爾河南王俾總天下兵而代之行庫庫特穆爾於是分省以自隨官屬之盛幾與朝廷等而用孫翥趙恒等爲謀主二十六年二月自京師還河南欲廬墓以終喪左右咸以爲受命出師不可中止乃復北渡居懷慶又移居彰德初李思齊與察罕特穆爾同起義師齒位相等及是庫庫特穆爾總其兵思齊心不能平而張良弼首拒命孔興圖魯卜等亦皆以功自恃各懷異見請別爲一軍莫肯統屬釁隙旣開遂成讐敵庫